

## Tabell 1-k

### Rammetilskot til kommunane 2015

Kommunane sitt rammetilskot blir løyvd over kap. 571, post 60–67 på statsbudsjettet. Samla rammetilskot i alt er vist i kolonne 9. Dette omfattar ikkje midlar løyvd på kap. 571, post 21 *Spesielle driftsutgifter*.

Innbyggjartilskotet med utgiftsutjamning er basert på talet på innbyggjarar per 1. juli 2014. Skatteutjamninga blir gjort fortløpande gjennom budsjettåret, etter kvart som skatteinntektene er kjende. I skatteutjamninga blir det nytta innbyggjartal per 1. januar 2015 og rammetilskotet til den enkelte kommune blir justert i høve til skatteutjamninga. Endeleg skatteutjamning er ikkje klar før i februar 2016, og er såleis ikkje med i berekninga av rammetilskotet i denne tabellen. Endeleg rammetilskot blir altså først klart i februar 2016.

### Kolonne 1 – Innbyggjartilskot (post 60)

Kolonne 1 viser innbyggjartilskotet medrekna utgiftsutjamning, tilskot med særskild fordeling og inntektsgarantiordninga. For meir detaljert dokumentasjon av innbyggjartilskotet, sjå tabell 2-k.

### Kolonne 2 – Distriktstilskot Sør-Noreg (post 61)

Kolonne 2 viser distriktstilskot Sør-Noreg. Tilskotet er nærare dokumentert i tabell D-k.

Distriktstilskot Sør-Noreg skal vareta kommunar i Sør-Noreg med ei svak samfunnsmessig utvikling. Tildeling av distriktstilskot Sør-Noreg tek utgangspunkt i distriktsindeksen, som er eit uttrykk for graden av distriktsutfordringar i ein kommune. Indeksen byggjer på indikatorar som sentralitet, reiseavstand, befolkningsstetleik, befolkningsstruktur og -utvikling, status for arbeidsmarknaden og inntektsnivå.

Tilskotet blir tildelt kommunar i Sør-Noreg som:

- har ein distriktsindeks mellom 0 og 46,
- har hatt ei gjennomsnittleg skatteinntekt dei siste tre åra som er lågare enn 120 pst. av landsgjennomsnittet (målt per innbyggjar), og
- ikkje mottek Nord-Noreg- og Namdalstilskot eller småkommunetilskot.

Tilskotet blir gjeve med ein sats per kommune og ein sats per innbyggjar. Satsane varierer etter verdien på distriktsindeksen. Tilskotet blir rekna ut frå talet på innbyggjarar per 1. januar 2014 og distriktsindeksen for 2013. Departementet føreslår å fordele i underkant av 397 mill. kroner gjennom distriktstilskot Sør-Noreg i 2015.

#### *Satsar for distriktstilskot Sør-Noreg 2015:*

Indeks	Per kommune (1000 kr)	Per innbyggjar (kroner)
Indeks 0–35	3 395	675
Indeks 36–38	2 304	541
Indeks 39–41	1 730	405
Indeks 42–44	1 154	272
Indeks 45–46	577	136

### Kolonne 3 – Nord-Noreg- og Namdalstilskot (post 62)

Kolonne 3 viser Nord-Noreg- og Namdalstilskotet i 2015. Nord-Noreg- og Namdalstilskotet blir berekna som ein sats per innbyggjar til kommunane i Nord-Noreg- og Namdalen. Tilskotet er basert på talet på innbyggjarar per 1. januar 2014. Satsane for 2015 er prisjusterte.

Satsar i 2015	Kroner per innbyggjar
Nordland og Namdalen	1 645
Troms (utanfor tiltakssona)	3 154
Tiltakssona i Troms	3 716
Finmark	7 701

### Kolonne 4 – Småkommunetilskot (post 63)

Småkommunetilskotet blir gjeve til kommunar som har færre enn 3 200 innbyggjarar. For å få småkommunetilskot, må kommunen i tillegg ha hatt ei gjennomsnittleg skatteinntekt dei siste tre åra som er lågare enn 120 pst. av landsgjennomsnittet. Tilskotet blir gjeve med ein sats per kommune. Kommunane i tiltakssona i Nord-Troms og Finmark får tilskot etter ein høgare sats.

Tilskotet blir berekna med utgangspunkt i talet på innbyggjarar per 1. januar 2014. Satsane for 2015 er prisjusterte.

Satsar i 2015	Sats per kommune (1 000 kr)
Kommunar i tiltakssona	11 857
Andre kommunar	5 475

### Kolonne 5 – Veksttilskot (post 66)

Veksttilskotet er eit tilskot til kommunar med særleg høg befolkningsvekst. Tilskotet er grunngeve med at kommunar med høg folkevekst på kort og mellomlang sikt kan ha vanskar med å tilpasse tenestetilbodet til ei voksende befolkning. Det kan vere problematisk å finansiere dei nødvendige investeringane utan at det verkar inn på tenestetilbodet.

Regjeringa varsla i kommuneproposisjonen for 2015 ei utviding av veksttilskotet. Fleire kommunar vil få tilskotet, samstundes som tilskotet blir auka. Veksttilskotet blir frå 2015 gjeve til kommunar som har hatt ein gjennomsnittleg årleg befolkningsvekst på 1,6 pst. eller meir dei siste tre åra. I tillegg må kommunane ha skatteinntekter under 140 pst. av landsgjennomsnittet dei siste tre åra (målt per innbyggjar). Veksttilskotet blir gjeve som eit fast beløp per nye innbyggjar ut over vekstgrensa. Satsen for 2015 er auka til 55 000 kroner per nye innbyggjar ut over vekstgrensa. Departementet føreslår å fordele om lag 393,4 mill. kroner som veksttilskot i 2015.

Grunnlaget for utrekninga er nærare dokumentert i tabell D-k.

### Kolonne 6 – Storbytilskot (post 67)

Storbytilskotet går til dei fire største kommunane, Oslo, Bergen, Trondheim og Stavanger. Tilskotet blir fordelt med eit likt beløp per innbyggjar. Satsen per innbyggjar for 2015 er 360,5 kroner.

### **Kolonne 7 – Skjønstilskot fordelt av fylkesmannen (post 64)**

Kolonne 7 viser skjønstilskot fordelt av fylkesmannen for 2015. I tillegg er det vist fylkesvise rammer for skjønstilskot til fordeling gjennom året.

### **Kolonne 8 – Skjønstilskot som kompensasjon for endringar i inntektssystemet (post 64)**

Frå 2011 blei det sett av 400 mill. kroner innanfor skjønnsramma til kommunar som tapte på endringane i inntektssystemet. Midlane blei fordelt direkte av departementet til kommunar som tapte meir enn 100 kroner per innbyggjar på totale verknader av endringane i inntektssystemet i 2011. Kommunane blei i 2011 kompensert med om lag halvparten av tapet utover 100 kroner per innbyggjar.

Fordelinga er vist i kolonne 8. Tilskotet skal liggje fast inntil neste revisjon av kostnadsnøkklane. Det er lagt opp til ein revisjon om lag kvart fjerde år.

På grunn av en feil i kriteriedata for 2011 fekk Sarpsborg kommune tildelt 3,4 mill. kroner av kompensasjonen i 2011. Dette beløpet blir ikkje vidareført etter 2011, og den totale kompensasjonen er difor redusert til 396,6 mill. kroner frå og med 2012.

### **Kolonne 9 – Rammetilskot 2015**

Kolonne 9 viser rammetilskotet for 2015 (sum av kol. 1-8).